

古本傷寒論 卷上

凡例

瀏陽劉瑞澍仲邁校讐

一、按古本傷寒雜病論十六卷。自晉大醫令王叔和搜采舊論。遺文時已散佚。今所刊行。爲張傳秘本十六卷。首尾完具。仍復舊觀。茲沿寫本舊名。曰古本傷寒雜病論。

二、世傳傷寒論。以宋林億校本爲最古。故據林本爲通行本。其餘箋疏各家。擅有更變刪削。益亂舊觀。悉不引據。

三、凡古本經文全條爲通行本所無者。注通行本佚四字於各條之下。

四、凡古本經文一句或一字。爲通行本所無者。注通行本缺四字於各該字句之下。以清眉目。

五、凡古本經文較通行本字句不通之處。以古本正通行本之誤。所改之字曰訂正。所加之字曰增。所減之字曰刪。每篇之後。各總其數曰計訂正若干字。增若干字。刪若干字。一卷有數篇者。更綜計全卷各篇之數。附於卷尾。

六、有全條字句古本爲通行本所錯亂者。隨字句注明外。並低格錄通行本條文於後。以便對勘。

古本傷寒雜病論序一

嘗聞故族兄月秋言。傷寒論。濟世之書也。宜讀之。余以志不在醫。雖留意未之鑽研。辛未春。共匪既平。流亡將復。而雨暘失序。寒燠不時。懼荒亂之後。疾疫之賊。吾民也。感求預防之策。得古本傷寒雜病論。蓋劉崑湘先生之所藏也。先生得之異人。授於劉仲邁君。秘之枕中久矣。乃請於仲邁。出之。則全書十六卷。加於常本三之二。展而讀之。亦得其解。如聘醫顧問焉。然後嘆爲古今壽世奇書。轉惜其出之之晚。且徵故族兄月秋之言爲足取耳。軍政餘暇。輒寫數頁。積久既竣。將付印。乃爲之言曰。傷寒論之爲經。歷二千年。註者甚衆。從無所謂古本者。突出而余信之。非偶然也。其文古而雋。其義精而約。其法周而密。其用藥立方。純一而不雜。信非後人所能增減矣。且孔門心法。今有傳人。道家秘籙。今得正解。天將啓萬古之秘鑰。以仁壽斯民也。是書之出。不亦宜乎。民國二十一年壬申春月。醴陵何鍵芸樵序。

古本傷寒雜病論序二

古本傷寒雜病論者。蓋今之壁經。而長沙之舊文也。同邑宗人崐湘先生。初受書於隱君子張老。以轉授余。其後十餘年。一日。崐湘示張老寄余書云。且來約以時相見。因偕崐湘如期造謁。遂得受教於逆旅中。自是數年。時往來於洞庭湘水之間。請益析疑。章梳句櫛。尋波討源。結轡盡解。一日。忽將別去。涕泣請留。不得。殷勤付囑。命詮次師傳。匯崐湘昔所尊聞者。成義疏以演論旨。曰。此真長沙舊文也。道之將廢。塵封至今。人能宏道。匪道宏人。復爲贈言之歌。曰。千歲以胥。我傳子疏。聖作明述。吾友吾徒。遂不復見。嗚呼。其乘願之大士乎。其長沙之後身乎。斯道之不亡。亦云幸矣。崐湘年已垂老。每督余成書以傳強學。余懼夫勤焉而力不至。且欲待。既竭吾才。乃誦所聞以公諸世。今者醴陵何公。有意乎斯道之傳。發願創長沙國醫學院。以成中興絕學之業。復以政暇。手寫論文。印行流布。囑爲導言釋論例。以供海內明達研討之助。

余惟古聖立言。例隨文見。論文十六卷。首脈法。以示診要。次序例。明運氣方宜。立傷寒傳經正治之法。次則暑濕燥熱溫瘧霍亂。各有專篇。次乃演六經本病壞病。以究病變喻活法一貫之旨。終之以可與不可用。示醫律。其書統百病之綱。詳奇經之治。以平脈辨症。見病知源爲宗。通其旨者。無不可舉一法以概諸凡。散萬殊而約於一成。國醫診斷之學。以詔萬世。尤以脈學最爲詳審。發軒岐不傳之奧。將欲稍釋論例。以暢厥旨。非萬言不足約其綱要。以汗青之速也。爰爲略述緣起。以紀壁經授受之由。世或以法言之象論語。太玄之擬周易爲類。蓋究夫醫之爲道。真理實效。卽事可驗。豈同談天雕龍堅白異同之說。可以意騁其辭哉。眞僞之辨。好學深思之士。當自得之。太歲在玄默。涪灘孟陬之月。瀏陽劉瑞澍仲邁序於天潛閣。

古本傷寒雜病論序三

余自少體弱多病。爲父母所偏憐。讀書從其意所好。不設程限。性喜汎覽。不以疲困

自休。既弱冠。得歧黃扁張之書。尤篤好之。每苦其奇奧難通解。於人有誦及四聖之言者。無不就而問也。於書有涉及四聖之言者。無不求而觀也。先母之喪。以求葬地。漫遊江西。於山谷中。遇一人曰張老。皓然而丹顏。岸然類有道者。卽與傾談。遂及醫術。質以平生疑滯。應口疏通。余大駭服。張老亦深喜余精審善問。且曰。吾樂山林。不與人接久矣。家有古本傷寒雜病論。與世所傳異。長沙舊文也。目前無可授者。今以授君。與君邂逅。亦前緣也。余謹受而讀之。乃知今本訛脫錯亂。注者紛紛數十家。而其理愈晦。亦何怪其然哉。余得此書。鑽研益勤。其於病也。猶執規矩以御方圓。不眩於心矣。而未嘗輒以示人。人亦囿於所習。自不省也。惟吾友劉君仲邁。一見而歎爲千古奇書。仲邁才高而學博。獨具卓識如此。於是吾兩人者。朝讀而暮思。欲遂窮其底蘊。往往窒極而遂通。若有鬼神者爲之助焉。積十餘年。所發揮益多。余嘗欲整次其語。以爲此書之注。而年老不任伏案。乃以屬仲邁。而仲邁尙未遑也。今省政府主

席何公芸樵。民政廳長曹公伯聞。閱民命之夭折。醫學之不振。注之不以時成。乃先出此書印行焉。且以宋槧林億校本校之。標明其同異。庶覽者一見而知古本之勝也。

民國二十一年壬申春月

瀏陽劉世禎崐湘甫序於六石山房

古本傷寒雜病論序四

余夙多病。經中西醫治療逾數年無一驗。且益困。後遇瀏陽劉崐湘先生治之。病遂已。凡余親友間得先生治療者。靡不如是。余於是信先生益深。先生平日服膺南陽張氏。而聞其議論。曲暢旁通。似有得於文字之外者。余疑其有異聞久矣。戊辰之夏。相與避暑乎廬山。時余病初癒。心曠而神怡。先生乃示余古本傷寒雜病論。且歷述此書所由得。余受而讀之。信今之學者所未嘗聞也。亟思取以付印。先生不可。曰。後

傷寒雜病論序五
世注傷寒論者。莫先於成無已。吾方取而校之未竟。吾與邑人劉君仲邁。於古本皆有詮釋。屬仲邁次第其語爲注。亦未成也。且待之。今年國中多故。湖南爲甚。人民流徙。疫癘并作。省政府主席何公芸樵閱焉。謂此書之行。不可復待。遂取而印之。此書既出。斯民其有瘳乎。余又思之。張氏守長沙。值大疫之流行。拯民命於垂絕。故我人世祀之。以寄其謳思。人之思之也深。則神之依之也久。所著之書。歷二千年訛缺。蓋亦數百年而僅存真本。卒歸於此邦之人。又遇何公恤民之心。與古賢守契合。而民適疾疫。此書因得以廣其傳焉。類神者爲之。非偶然也。然則讀此書者。何異親炙醫聖於一堂。端拜而請益也。不亦幸乎。長沙曹伯聞序。

傷寒雜病論序五

論曰。余每覽越人入虢之診。望齊侯之色。未嘗不慨然歎其才秀也。怪當今居世之士。曾不留神醫藥。精究方術。上以療君親之疾。下以救貧賤之厄。中以保身長全。以

養其生。但競逐榮勢。企踵權豪。孜孜汲汲。惟名利是務。崇飾其末。忽棄其本。華其外而悴其內。皮之不存。毛將安附焉。卒然遭邪風之氣。嬰非常之疾。患及禍至。而方震慄。降志屈節。欽望巫祝。告窮歸天。束手受敗。賣百年之壽命。持至貴之重器。委付凡醫。恣其所措。咄嗟嗚呼。厥身已斃。神明消滅。變爲異物。幽潛重泉。徒爲啼泣。痛夫舉世昏迷。莫能覺悟。不惜其命。若是輕生。彼何榮勢之云哉。而進不能愛人知人。退不能愛身知己。遇災值禍。身居厄地。蒙蒙昧昧。蠢若遊魂。哀乎趨世之士。馳競浮華。不固根本。忘軀徇物。危若冰谷。至於是也。余宗族素多。向餘二百。建安紀年以來。猶未十稔。其死亡者。三分有二。傷寒十居其七。感往昔之淪喪。傷橫夭之莫救。乃勤求古訓。博采衆方。撰用素問九卷。八十一難。陰陽大論。胎臚藥錄。並平脈辨證。爲傷寒雜病論合十六卷。雖未能盡愈諸病。庶可以見病知源。若能尋余所集。思過半矣。夫天布五行。以運萬類。人稟五常。以有五藏。經絡府俞。陰陽會通。玄冥幽微。變化難極。自

非才高識妙。豈能探其理致哉。上古有神農、黃帝、歧伯、伯高、雷公、少俞、少師、仲文。中世有長桑、扁鵲。漢有公乘陽慶及倉公。下此以往。未之聞也。觀今之醫。不念思求經旨。以演其所知。各承家技。終始順舊。省疾問病。務在口給。相對斯須。便處湯藥。按寸不及尺。握手不及足。人迎跌陽。三部不參。動數發息。不滿五十。短期未知決診。九候曾無髣髴。明堂闕庭。盡不見察。所謂窺管而已。夫欲視死別生。實爲難矣。孔子云。生而知之者上。學則亞之。多聞博識。知之次也。余宿尙方術。請事斯語。漢長沙太守南陽張機。

傷寒雜病論

目錄

卷第一

平脈法第一

卷第二

平脈法第二

卷第三

傷寒例第三

卷第四

辨溫病脈證并治第四

卷第五

辨暑病脈證并治第五

辨熱病脈證并治第六

辨濕病脈證并治第七

辨燥病脈證并治第八

卷第六

辨太陽病脈證并治上

卷第七

辨太陽病脈證并治中

卷第八

辨太陽病脈證并治下

卷第九

辨陽明病脈證并治

卷第十

辨少陽病脈證并治

辨太陰病脈證并治

卷第十一

辨少陰病脈證并治

辨厥陰病脈證并治

卷第十二

辨霍亂病脈證并治

辨瘧陰陽易差脈證并治

卷第十三

辨不可發汗病脈證并治

辨可發汗脈證并治

卷第十四

辨發汗後病脈證并治

辨不可吐

卷第十五

辨不可下病脈證并治

辨可下病脈證并治

卷第十六

辨發汗吐下後脈證并治

傷寒雜病論卷第一

漢長沙太守南陽張機仲景述

平脈法第一

問曰。脈何以知氣血藏府之診也。師曰。脈乃氣血先見。氣血有盛衰。藏府有偏勝。氣血俱盛。脈陰陽俱盛。氣血俱衰。脈陰陽俱衰。氣獨盛者則脈強。血獨盛者則脈滑。氣偏衰者則脈微。血偏衰者則脈澹。氣血和者則脈緩。氣血平者則脈平。氣血亂者則脈亂。氣血脫者則脈絕。陽迫氣血則脈數。陰阻氣血則脈遲。若感於邪。氣血擾動。脈隨變化。變化無窮。氣血使之。病變百端。本原別之。欲知病源。當平脈變。欲知病變。先揣其本。本之不齊。在人體躬。相體以診。病無遁情。通行本佚

問曰。脈有三部。陰陽相乘。榮衛血氣。在人體躬。呼吸出入。上下於中。因息遊布。津液流通。隨時動作。效象形容。春弦秋浮。冬沉夏洪。察色觀脈。大小不同。一時之間。變無

經常。尺寸參差。或短或長。上下乖錯。或存或亡。病輒改易。進退低昂。心迷意惑。動失紀綱。願爲具陳。令得分明。師曰。子之所問。道之根源。脈有三部。尺寸及關。榮衛流行。不失衡銓。腎沉心洪。肺浮肝弦。此自經常。不失銖分。出入升降。漏刻周旋。水下百刻。一周循環。當復寸口。虛實見焉。變化相乘。陰陽相干。風則浮虛。寒則牢堅。沈潛水畜。支飲急弦。動則爲痛。數則熱煩。設有不應。知變所緣。三部不同。病各異端。太過可怪。不及亦然。邪不空見。中必有奸。審察表裏。三焦別焉。知其所舍。消息診看。料度府藏。獨見若神。爲子條記。傳與賢人。

師曰。平脈大法。脈分三部。浮部分經。以候皮膚經絡之氣。沉部分經。以候五藏之氣。

中部分經。以候六府之氣。

通行本佚

師曰。脈分寸關尺。寸脈分經。以候陽。陽者氣之統也。尺脈分經。以候陰。陰者血之注也。故曰陰陽。關上陰陽交界。應氣血升降。分經以候中州之氣。

通行本佚